



Moyse refugié en Madian, defend les filles de Iethro, contre des Bergers qui les molestoient.

MOYSE fut fugitif en la terre de Madian, & se trouvant lassé du travail du chemin, s'assit auprès d'un Puits. Or le Prestre de Madian nommé Iethro, avoit sept filles, qui vindrent puiser de l'eau au Puits, & remplir les auges pour abbreuer le bestial de leur pere. Lors survint vne troupe de rustiques Bergers, qui rudement dechassoient du Puits les filles de Iethro : Mais Moyse ne pouvant supporter cette violence, se leua, & les deffendit, & abbreuua leur bestial malgré les Pasteurs. Or les filles estans retournées au logis, leur pere leur dit : Pourquoi estes-vous reuenuës aujourd'huy des champs plustost que de coustume ? Elles répondirent, Vn homme Egyptien nous a deliurées de la main des Pasteurs, & a tiré l'eau, & abbreuué le bestial. Et il dit, Où est-il ? Pourquoi l'avez vous laissé ? Appelle-le, afin qu'il mange du pain. Adonc Moyse vint, & iura d'habiter avec Iethro, la fille duquel, nommée Sephora, il print à femme ; & elle luy enfanta vn fils qu'il appella Gersam, disant ; I'ay esté Pelerin estrange. Aussi elle enfanta vn autre fils, qu'il appella Eliezer, disant ; Pource que le Dieu de mon pere est mon adjuteur, & m'a deliuré de la main de Pharaon.